

*ton. 28. 12. 1793*  
Q. D. B. V.

DISSERTATIO INAUGURALIS MEDICA  
DE

MEDICINAE SECTAE  
EMPIRICAE VETERIS ATQVE  
HODIERNAE DIVERSITATE

QVAM

*PRAESIDE*

LAVRENTIO HEISTERO

MED. D. SER. DVC. BRVNOV. AC LVNEB. A CONSILIIIS AVLICIS  
ET ARCHIATRO, PRAECEO CHIRVURGIAE AC BOTANICES  
PROFESSORE PVBLICO ET PRIMARIO, ACAD. SCIENT.  
CAES. NEC NON REG. LOND. AC BEROL. COLLEGA  
LONGE GRAVISSIMO FACVLTATIS SVAE  
SENIORE ET H. T. DECANO

SPECTABILI

*DN. PATRONO, PRAECEPTORE AC PROMOTORE*

OMNI HONORIS CVLTV AETATEM PROSEQVENDO

PRO GRADV DOCTORIS  
SVMMISQVE IN MEDICINA HONORIBVS PRIVI-  
LEGIIS ATQVE IMMVNITATIBVS LEGITIME  
IMPETRANDIS

*IN IVLAEO MAIORI*

HORIS ANTE ET POMERIDIANIS CONSVETIS  
PVBLICO ERVDITORVM EXAMINI SVBMITTIT  
RESPONDENS ATQVE AVCTOR

MICHAEL ANTHON. KAYSER

BEVERA-BRVNOVICENSIS

---

D. XXVIII. DECEMBRIS MDCC XLI.

---

HELMSTADII, LITTERIS SCHNORRIANIS,

~~SECRET~~

CONFIDENTIAL

MEDICINE  
HISTORICAL  
RECORDS

RECORDS

RECORDS

RECORDS

RECORDS

RECORDS

RECORDS

RECORDS

RECORDS

RECORDS

RECORDS

RECORDS

RECORDS

RECORDS



## PROOEMIUM.



Inem studiis academicis imponere cum constituissem, per diu mecum deliberavi atque haesitavi, quodnam potissimum argumentum ad specimen inaugurale exhibendum eligerem; ne ego idem, quod alii in forma dissertationis plus semel pertractarunt, inque lucem ediderunt, proferre vel dicere viderer. Indices ideo & literas publicas, eruditorum scripta in hunc usque diem edita, exhibentes, perlegebam, an quandam materiam inter tam immensam Dissertationum farraginem, in academiis ab huiusmodi seculi initio habitarum, quae minus frequens pertractata & ventilata occurreret, invenire possem, & eo thema quoddam eligendi copiam & faculta-

tem obtinerem. In perlegendis igitur dictis hisce literis occupatus, inter alias dissertationes, meis quoque sese offerebat oculis dissertatio inauguralis, ILLVSTRIS atque DOCTISSIMI DOMINI D. WERLHOFII de Medicina sectae Methodicae veteris, eiusque usu & abusu, inscripta. Cum igitur nullam aliam, de secta quadam Medicinae conscriptam alicubi legere, vel invenire memini: ideo pari modo sequens thema, de Medicina sectae empiricae veteris atque hodiernae diversitate, specimine, ut puto, inaugurali haud indignum, eligere & publico examini submittere decrevi. De ipso itaque pertractationis modo, pauca adhuc, quae hic moneam, habeo: scilicet, me illam tribus sectionibus proponere velle, & in prima quidem de secta empirica veterum, eiusque origine, progressu & dogmatibus; in secunda de empiria hodierna, vel quales sint empirici hodierni, & an nomen quoque empirici mereantur, docere; & in tertia quaestionem movere, an empiricus cum certitudine morbum quandam curare possit? cum hodie non vulgus solum, sed multi etiam eruditi, empiricum aequè bene morbum, ac Medicum rationalem, curare posse credunt: sed quo haec vesana opinio innitatur fundamento, pluribus suo loco ostendere conabor. Interim Deum Ter Optimum Maximum supplex veneror, ut conatus meos ita secundare velit, ut in sui gloriam, generisque humani salutem cedant.

DISSERTATIONIS INAUGURALIS MEDICAE

SECTIO I.

MEDICINAM SECTAE EMPIRICAE  
VETERIS, EIVSQUE ORIGINEM PRO-  
GRESSVM ET DOGMATA  
TRADENS.

§. I.

**D**E Secta empirica veterum mihi praesenti in  
Sectione agere cum proposuerim: boni ordinis  
ergo melius esse reputavi, si prius qualem Me-  
dicina ortum & progressum habuerit, brevi, quan-  
tum fieri potest, ostenderem.

§. II.

Eius enim necessitatem a primis iam tempori-  
bus veteres agnovisse, & sana ratio, & illorum mo-  
numenta satis edocent. Nam per quotidianam  
cum discerent experientiam, sua corpora variis ca-  
sibus atque afflictionibus esse exposita; variasque  
semper mutationes illorum contingere, pro variis  
nempe conditionibus assumptorum, aëris, vento-  
rum, locorum vitaeque generis vel quieti vel labo-  
riosi, quibus sanguis & humores in corpore plus mi-  
nus exagitarentur atque immutarentur, & corpus in-  
de debilitaretur. Ideo commoti sunt, suas cogita-

tiones in eo configere, quo media invenirent, quibus sua corpora facta tectaue conservarent, & sanitatem adfectam redintegrarent.

### §. III.

Multas itaque radices herbas aliasque res, quae occasio vel circumstantiae praesentes, in hoc illove casu suppeditabant, si alia nota & utilia simili casu iam reperta media non constarent, vel etiam non statim adessent, ad dolorem leniendum & malum tollendum, molesta perceptione impediti in membris quibusdam motus, aut tormento doloris laesam quamcunque partem exagitantis, angorisve vehementia animum opprimentis commoti, in usum trahebant; licet qualem effectum, iuvantem an nocentem efficerent, adhuc ignorarent.

### §. IV.

Si igitur adplicatum medium, per talia experimenta sive casum fortuitum salutare inventum fuerit, in casu simili rursus adhibuerunt, effectum inde perceptum annotarunt, & si iterum salutare deprehenderint, aliis quoque simili adfectu vel morbo laborantibus adhibendum suaserunt: & hac ratione remedia per usum saepius repetitum contra hoc illudve malum sunt inventa, & ita Medicina primum orta est.

### §. V.

Quamquam vero haec nusquam non tentata fuit: siquidem imperitissimae etiam gentes herbas aliasque

que prompta, teste CELSO, in auxilium vulnerum morborumque noverunt. Verumtamen Assyrii, Babylonii, Chaldaei, Aegyptii & Magi cum primis eam investigando remedia, excoluerunt: ut enim HERODOTVS refert, priscis Babyloniis in usu fuisse, ut languentes in forum efferrent praetereuntes consulendi gratia, an simili morbo laborarint, vel similem viderint? & ecquod remedium ipsis vel aliis auxilio fuerit; neque enim fas fuerit, silentio praeterire languentes, verum oportuerit explorare quo adfectu aeger aliquis esset: & PLVTARCHVS scribit, priscos aegrotos suos in publico exposuisse, ut praetereuntium quivis, si quid, vel ipse eodem morbo conflictatus, vel similiter laboranti opitulatus, medelae nosset, id aegrotanti significaret; aiuntque artem hoc modo experientia adiuvante, crevisse. Item STRABO, Geogr. lib. III. scribit, apud Lusitanos moris fuisse, aegrotos *vetusto ritu Aegyptiorum* in plateis deponere, ut, qui eo morbi genere tentati sunt, commonefacere eos valeant.

#### §. VI.

Medicinam vero in primis in Graecia floruisse, videre licet ex CELSO, si dicit: apud Graecos *aliquanto magis, quam in caeteris nationibus exculta est Medicina*: ubi primum AESCVLAPIVM Auctorem Medicinae *vetustissimum*, illam scientiam, valde adhuc *rudem & vulgarem*, paulo subtilius excoluisse, & hanc ob causam in Deorum numerum receptum fuisse, idem auctor memorat: de cuius peritia in medi-

dicina GALENVS in Introductionis praefatione ita loquitur : sed *haec experientia* (scil. Chironis Centauri, Aristaei, Melampodis & Polyidi, Aesculapio superiorum) *ratione vacua, nondum rationalis fuit.* Caeterum perfectam Medicinam & omnibus numeris absolutam, nimirum divinam aio, AESCULAPIVS solus invenit. Huius deinde duos filios *Podalirium & Machaonem* bello Troiano ducem AGAMEMNONEM secutos, non mediocrem opem suis commilitonibus attulisse, narrat CELSVS. Quos tamen HOMERVS non in pestilentia, neque in variis generibus morborum aliquid attulisse auxilii, sed vulneribus tantummodo ferro & medicamentis mederi solitos esse, proposuit. Ex quo confici scribit CELSVS, has *partes Medicinae solas ab his esse tentatas* easque esse vetustissimas.

### §. VII.

Aesculapio igitur mortuo, non Graeci solum sed aliae etiam gentes ob famam & honores, uti credebant divinos, multa templa illi, filiis & illius nepotibus, ad Aegyptiorum imitationem, construxerunt; quorum in Graecia eiusque colonis satis magnus ut PAVSANIAS & ex illo Doctiss. SCHULTZIVS exhibet, a) fuit numerus. Ad religionem vero in hisce templis perficiendam, constituebantur *sacerdotes*, quorum *praecipuum officium erat medicam artem excolere*, eamque filios suos aut alios collegio adscribendos,

a) in Historia Medicinae p. 113.



dos, docere, deoque se praebere in templo suo, a) per somnum de recuperandae valetudinis remedio erudiendos: Ideo Pausanias illos vocat δούλους τοῦ Θεοῦ, & fert illos *fuisse personas honoratas*, medicinae scientiae imbutas, & quos ab ipso AEscVLAPIO genus ducere, gloriaſſe: quare etiam se ASCLEPIADAS appellabant. *Hi ergo Medicinam in templis perſat longum tempus & minimum per quingentos annos poſſeſſione ſatis quieta exercuerunt*, quo toto intervallo, *Medicum, qui ſuo nomine artem exercuerit, haud facile apud Graecos invenias*. Atque hoc forte, ut Celeb. SCHVLZIUS putat, induxit, *Iſidorum Hiſpalenſem* (Origin. IV. Cap. 3.) ut ſcriberet: *Poſtquam fulminis icſtu Aeſculapius interiiit*, interdita fertur medendi cura & ars ſimul cum Auctore defecit, latuitque per annos fere quingentos, uſque ad tempus Artaxerxis Perſarum regis: tunc ad lucem eam revocavit HIPPOCRATES, Aſclepio patre genitus in inſula Covalida & Aeſculapio dicata.

### §. VIII.

Ad haecce templa quotidie aegrotantes, variis morbis adſicci, auxilium a Numine quaerentes cum confluere & hoc illudve remedium, quod ſacerdotes *ab experientia* cognitum, vel ut dicebant, *a Numine* per inſomnium revelatum ſuaſerant, applicarent; tum, ſalutaris inde ſi contingebat effectus, mos & ritus poſtulabat, quid iuviſſet in morbo, literis conſignatum in templo relinquere. Ita-

B

que

a) vid. SCHVLZII Hiſt. Med. Period. I. Sect. II. Cap. IV.

que templi columnis & parietibus ditiores; tenuioris vero fortunae homines, longioris recordationis gratia, tabulae cuidam inscribenda curabant. Sed non solum in Aesculapii templo hoc gratum animum testandi modo utebantur, verum etiam in aliis pluribus hoc faciebant, quicumque se Dei cuiusdam praesentanea ope servatos, magnoque periculo ereptos credebant. Et huius generis tabularum saepius apud veteres invenimus mentionem: nam STRABO a) de Epidauro hoc modo scribit: *haec urbs non parum insignis, praesertim ex Aesculapii claritate nobilitata, quem varia morborum genera curasse, somniascent homines.* Erat vero templum aegrotantium multitudine usque quaque repletum, pendentibusque tabellis, in quibus sanati languores erant inscripti; quemadmodum & in Insula Co fiebat, pariter & Trica. Et PAUSANIAS b) scribit: *sargit Aesculapii templum, Cyros appellatur. Multa hic monstrantur morborum remedia.* HIERONYMVS MERCVRIALIS c) multa talium tabularum exempla legenda exhibet.

#### §. IX.

Inter ea igitur cum Medicinam exercerent Aesclepiadae, factum est, ut Philosophi, qui rerum causas indagare, harumque rationes profiteri conabantur, se quoque immiscerent Medicinae, atque rerum naturalium, morborum & curationum causas investigare molirentur. Quanquam vero hoc iniquo ferebant

a) Geogr. lib. 8.

b) In Achaicis Cap. CXXXV.

c) lib. I. Cap. I. de Arte gymnastica.

bant animo Medici, tamen, quo minus hoc fieret, impedire non valebant. Qua vero re, & quo iure hoc facere illi sibi sumserint, illius, ut mihi videtur, *rationem*, nec minus *nervose atque eleganter dedit* PLVTARCHVS a), cuius verba utique digna esse cenfeo, hic ut adponantur: *Philosophico nimirum es ingenio*, (hoc modo ZEYXIPPVS adloquitur MOSCHIONEM) & *succenses Philosopho*, qui *studiosus rei Medicæ*: indigneque fers, si existimet, magis sui esse officii, ut videatur *Geometriae Dialecticae & Musicae deditus*, quam ut inquirere ac discere cupiat, *in suo corpore*, hoc est:

Aedibus in propriis quid recte, quid male fiat. Atqui plures ad spectaculum confluere solent, ubi publicitus pecuniae aliquid inter spectatores distribuitur, sicut fit Athenis. Et vero *Medicina* de reliquis artibus, *nulli nitore, copia, iucunditateque cedens*, sui Studiosis praemium spectandi porro largitur incolumitatem corporis atque sanitatem. Non itaque intentandum id crimen Philosophis, de sanitate disputantibus est, quasi vero limites transilierint. Imo id potius vitio esset dandum, si non, sublati omnino terminis, locum hunc sibi communem cum Medicis ducerent, in eoque suavitatem cum necessitate iunctam egregio studio consecrarentur. Ex quibus verbis videre quoque possumus, quo honoris loco eo iam tempore *Medicina* sit habita.

a) in Dialogo. Edit. Basil. p. 305.

## §. X.

Haud exiguum vero Medicinam cepisse incrementum, non ex Medicorum solum constitutione, in Aegypto praesertim facta, sed *etiam ex Philosophorum industria*, rerum naturalium, morborum atque curationum causas investigandi, de hoc illi, qui statum, quo eo tempore Medicina fuit, perpendunt, dubitare haud possunt. Nam *plurimi tum temporis Medicorum, imprimis apud Aegyptios, uni tantum corporis humani*, uti referunt Auctores, *parti, mederi incumbabant.* Et nemo universum corpus propter difficultatem operis, dum Medicina nondum erat in artis formam redacta, ad curandum, suscipiebat. HERODOTVS itaque sequentia adducit: Medicina apud eos, sc. Aegyptios, hunc in modum distributa est, *ut singulorum morborum singuli sint Medici & non plurium.* Itaque omnia sunt referta Medicis: alii enim sunt *ocularii*, curandis oculis constituti, alii *capiti*, alii *dentibus*, alii *alvi partibus*, alii *merbis occultis.*

## §. XI.

Philosophis autem scientiae medicae originem aperte tribuit Corn. CELSVS a) quando scribit: post eos (sc. Aesculapium, Podalarium, & Machaonem) nulli clari viri Medicinam exercuerunt: donec maiore studio litterarum disciplina agitari coepit, quae ut animo praecipue omnium necessaria, sic corpori inimica est. *Primoque medendi scientia sapientiae pars hab-*

a) in praefatione Lib. I.

*habebatur, ut & morborum curatio, & rerum naturae contemplatio sub iisdem auctoribus nata sit:* Scilicet his hanc maxime requirentibus, qui corporum suorum reborum, inquieta cogitatione, nocturnaue vigilia minuerant. Hoc est certissimum, Philosophos, cum se rei medicae dederunt, & sanitatis, morborum, vitae, mortisque causas scrutari, & de his non frequentius solum inter homines differere, sed meditationes etiam suas scriptis libris propagare inciperent, maximum attulisse Medicinae incrementum. Fieri enim non potuit, quin Asclepiadae & Medici, iniquo animo hoc ferentes, alios, de gente Asclepiadum haud oriundos, se conari, medicinam ipsis e manibus extorquere, maiori ardore illam excolere studuerint: imo inter ipsos diversorum templorum sacerdotes aemulum excitarunt ardorem. GALENVS enim ita scribit. a) Illi, sc. sacerdotes in Insula Co & Cnido, perpetuo inter se certabant de Apollinis Aesculapiique arte, tum exercenda, tum semper augenda ac pro viribus perficienda; atque olim non parva lis erat eorum, qui in Co & Cnidio habitabant, utri videlicet inventorum remediorum multitudine reliquos superarent.

## §. XII.

HIPPOCRATES Crous autem vir & arte & facundia insignis, primus fuit, referente CELSO b) qui ex omnibus memoria dignis, a studio sapientiae disciplinam hanc, sc. Medicinam, separavit, non ut dis-

a) Meth. med. Lib. I.      b) in citata praef.

iungeret, & philosophiam excluderet, sed ut seorsim eam colendo incrementa artis promoveret. Praeter ea quoque cum animadverteret, medicinam quidem per Philosophos ex Asclepiadarum servitute esset liberata; multis e contrario sophisticis disputationibus atque rebus fictis esset referta: ideo nihil ex Philosophia ad Medicinam a priori discendum adferri voluit; sed contendit, naturae cognitionem sive philosophiam naturalem, Medico utilem, addisci debere, ex effectibus singulorum, extra nos positurorum, quae vel intra corpus assumuntur, vel exterius corpus adficiunt, observandis. Prae reliquis vero, studium physicum Medico summe necessarium valde commendat: itaque dicit, a) Ἰητὺρὸς Φιλόσοφος ἰσόθεος: & b) αὐτὸς περὶ φύσεως εἶναι: Sed hoc nihil aliud intellexit, quam ut Medicus studere debeat, acquirere collectionem observationum, per experientiam cognitarum, de effectibus rerum extra nos positarum, corpus nostrum, si vel intro sumta sunt, vel quocunque modo nos adfecerunt, iuvandi vel laedendi viribus instructarum. Primus quoque fuit, qui monumenta morborum atque curationum in Insulis Co & Cnido praesertim, in templis reperiunda, conscripsit, & additis suis observationibus, e propria praxi enatis, in artis formam redegit, atque ita primum medendi praecepta, longe post hominum memoriam condidit, ideo quoque merito vocatur antiquissimus & optimus Medicinae parens atque scriptor. Nam plurimos eius temporibus fuisse Medicos, aut saltem se

Me-

a) Lib. de decenti ornatu, b) Lib. de sterilitate.

Medicos esse, profectos, ipsemet scribit, a) quando, *Medicos fama & nomine quidem multos, re autem & opere valde paucos dari*, conqueritur.

### §. XIII.

Post HIPPOCRATEM autem Dioclem Caristium, deinde Praxagoram & Chrysippum, tum Herophilum & Erasistratum, sic artem hanc exercuisse, ut in diversas curandi vias processerint, memorat CELSVS; & statim addit: iisdem temporibus *in tres partes diducta est Medicina: ut una esset quae victu: altera quae Medicamentis: tertia quae manu mederetur*. Primam *διατητικήν*; secundam *φαρμακευτικήν*; tertiam *χειρουργικήν* Graeci nominaverunt. Hisce autem verbis CELSO in animum non venisse, ut dicere vellet, totum Medicinae corpus in tres quasi disiunctas partes dissectum fuisse, sed unamquamque potius illarum magis quam antea esse excultam atque amplificatam, & verbo, quicquid ad perfectionem partium suarum requiri poterat, brevi esse consecutam, hoc perspicue exponit Celeb. SCHULTZIVS. b)

### §. XIV.

Quanquam vero ante memorati Auctores omnem, uti constat, adhibuerunt diligentiam, causas & rationes investigandi, quare remedia per usum & experimenta usque huc inventa, hunc vel illum in corpore producerent effectum, iuvantem vel nocen-

a) in Lib. de lege. b) in Historia Medic. p. 419.

centem, prout aegrotorum circumstantiae & morborum causae erant diversae & variae, in quas diligentissime inquirerent philosopho - medici : attamen non defuerunt alii, *qui omnem rursus abiicerent atque respuerent rationem*, dum animadverterent, non multos solum, quid hoc illove casu sentirent, secum adhuc esse incertos, sed paucissimos etiam Medicos, rationales se professos, de causis & rationibus, cum morborum, tum remediorum, inter se convenire; nihilo tamen minus morbos quemvis curare: hanc igitur ob rem commoti, *experimentorum notitiam & usum iam sufficere medico*, ad morbos curandos, contendebant. Et hac ex causa hi se appellabant *εμπειρικοί* experientiam solam sectantes, non vero a quodam sectae suae Auctore vel Antistite. Erant autem Sectae empiricae addicti, homines, qui in morbis curandis, eadem rursus applicabant remedia, quae in morbis similibus per usum & experientiam solummodo post habita ratione proficiuā didicerant. Occasionem vero dictis empiricis, diversam conficiendam sectam, dederunt reliquorum medicorum dissensiones atque contentiones, de abditis morborum causis, actionibus naturalibus & remediorum rationibus, quare nempe nonnunquam prodesse, nonnunquam nocere, & non ubique locorum, unum eundemque praestarent effectum.

### §. XV.

Quod ad primum huius sectae nunc conditorem attinet, non unam eandemque fovent Auctores sententiam



tiam. Nam GALENVS a) ita refert: Sæctæ Empiricæ præfuit PHILINVS Cous, qui *primus Medicinam a rationali abscidit*, occasione ab Herophilo, suo præceptore accepta. ACRONEM vero Agrigentinum *Empiricam primum Sæctam condidisse* PLINIVS b) perhibet; Sed qua de causa hoc fecerit, sequentibus GALENVS c) memorat verbis: Cum autem *suam hæresin principem esse vellent*, ACRONEM Agrigentinum *quo rationali esset vetustior*, ei dedisse initium, dixerunt. Nihilo tamen minus GALENVS alio loco d) eum, primum Empiricæ disciplinæ scriptorem appellat. CELSVS e contrario, qui his antiquior, ita narrat: Serapion primus omnium nihil hanc rationalem disciplinam pertinere ad medicinam professus, *in usu & experimentis eam* posuit. Cui igitur dictorum Auctorum maior sit habenda fides, scriptorum quoque iudicia, rerum medicarum historiam proponentium, sunt diversa: quidam enim cum PLINIO, ACRONEM Agrigentinum; alii PHILINVM Coum, secundum GALENI sententiam; & SERAPIONEM cum CELSO rursus alii fuisse Sæctæ Empiricæ parentem, credunt. Quoniam vero cuiusque sententia suis gaudet rationibus & veri similitudine; unius autem vera tantum esse potest: ergo meum suspensurus decifum, aliis libens hoc diiudicandum relinquo, dum mihi perinde est, quem quisque *primum huius Sæctæ conditorem* fuisse credat,

C

dum

a) in Introduct. cap. III.      b) Histor. Nat. lib. XXIX. cap. I.

c) loc. cit.      d) in Lib. de Subfigurat. Empir. cap. I.

dum neque damni neque utilitatis aliquid in artem medicam, si quid ego videre valeam, inde potest redundare.

### §. XVI.

Causam vero, quae huius Sectae Auctorem, quis quis etiam ille trium dictorum fuerit, moverit, in singularem illam, & dogmaticis vel rationali disciplinae adversam, ut abiret sententiam, a nullo auctore certe relatum inveni. GALENVS quidem refert, PHILINVM Coum, occasionem a rationali disciplina faciendi separationem, ab HEROPHILO suo praecceptore accepisse; sed quae illa proprie fuerit, alto suppressit silentio. *Fundamentum autem huius Sectae unicum fuit: Experientia*, Ἐμπειρία graecae dicta: nam hanc Medico a) iam sufficere, dum medicam artem non ab *indicatione*, uti dogmaticis placebat, sed ab *Experientia* b) tantum esse constitutam, certo certius sibi persuadebant. Et repertis medicinae remediis homines demum coepisse de illorum rationibus differere c), dicebant, nec post rationem Medicinam esse inventam; sed *post inventam medicinam, rationem esse quaesitam*: & ne agricolam quidem, aut gubernatorem disputatione, sed usu fieri: ergo Medicum multo minus disputatione vel causarum latentium indagatione aut eloquentia, Medicum evadere vel morbum curare posse, concludebant, *nisi experimentorum notitia atque experientia illum fecerit Medicum.*

### §. XVII.

a) GALENVS de Sectis Cap. I.    b) Idem de Subfig. Empir. cap. II.  
c) CELSVS in Praef. lib. I.

## §. XVII.

Experientiam autem vocabant cognitionem, *αὐτοψία* a) acquisitam: *Αὐτοψία* vero eorum memoriam esse dicebant, quae saepe numero & eodem modo visa fuerint. Hanc autem rursus esse vel *fortuitam* vel *consulto* factam, pronuntiabant; fortuitam, sine humano consilio, vel casu, vel natura evenire: casu; si quis occipitis dolore adfectus, invitus terrae caput impingeret, atque, vena frontis vulnerata, portioneque sanguinis effusa, eo a dolore liberaretur: natura autem, si febre laborans, dum sanguinem per nares stillaret, a febre immunis evaderet. Consultam denique ab intuitu esse cognitionem, quando aliquis, aut insomniis suadentibus b) aut aliunde arbitrio ductus, volens ad experimentum veniret. v. gr. si quis in febre perditae sitiens, ad bibendam aquam vel mala granata edenda coactus febrem amittat; aut si quis in monte a serpente morsus obviam herbam vulnere adhibuerit, sanitatemque inde recuperaverit. Tertium vero experientiam acquirendi modum ponebant illi in imitatione: c) ubi aliquispiam id, quod semel atque iterum, aut etiam saepe effectum conspexerit, in casibus imitaretur similibus, eundemque in iisdem notaret effectum.

## §. XVIII.

Hocce igitur modo, *ad experientiam perveniebant* *πειραζόμενοι*, d) *quam, ab experimentalī disciplina ortam,*

C 2

a) GALENVS de Subfig. cap. II.

b) idem de Sectis cap. I.

c) idem de Subfig. cap. II.

d) idem de Subfig. cap. II.

*tam, soli artifices usu exercebant.* Experimentalem vero disciplinam explicabant, per habitum eorum, quae ita frequenter apparuerunt, ut iam inde theorematata sint constructa, atque ita perceperint, *num illa semper, aut plerumque, aut utrovis modo, aut raro evenire soleant.* Theorema vero dicebant, habitum rei, quam saepe viderint cum eventus oppositi distinctione: v. gr. id quod semper eodem modo contingit, oppositum eius nunquam accidere, & quod plerumque contingit, eius contrarium aliquando quidem, sed raro evenire: eius autem, quod utrovis modo fit, aequalem esse oppositi eventum: sicut illius, quod raro accidit, contrarium frequenter apparere. Et sic ex adductis patere existimo, *Empiricos veteres, sive Sectae Empiricae vere addictos in arte salutari non fuisse rudes, sed exercitatissimos.*

### §. XIX.

Ad habitum autem hunc experimentalem consequendum, commendabant, praeter observationes proprias, per *ἀντοψίαν* & imitationem comparatas, *lectionem historiarum sive observationum, ab aliis fideliter consignatarum;* quae ordine referant, quales morbi fuerint, quid in iis acciderit, & quid hoc vel illud remedium effecerit; & denique *Epilogismum, τοῦ ὁμοίου μετάβατιν, transitum ad simile, a) vel substitutionem rei similis:* cum ab uno morbo iam cognito ad alium incognitum; a remedio in morbo quodam  
ex-

a) GALENVS de Subfig. empir. cap. X.

experto, ad aliud, similitudinem quandam cum illo referens, quid hic sit faciendum, vel applicandum, concludebant. Atque tres hasce partes, scil. *Ἀποψίαν*, Historiam, & Epilogismum, sive transitum ad simile; vel ut alii dicebant: Sensus, Memoriam, & Epilogismum, *tres medicinae columnas* appellabant; quas Glaucias inde denominavit τῇν τεῖπουδα τῆς Ἰητρικῆς.

### §. XX.

Quod vero ad Sectae Empiricae dogmata profitemium specialiozem methodum attinet medendi, illi inprimis in morbis curandis, *quaenam sint eorum causae evidentes atque manifestae*, celeri circumspiciebant mente: num scilicet *morbum fatigatio an sitis, an frigus, an calor, an vigilia, an fames fecerit, an cibi vinique abundantia, an intemperantia libidinis*. Porro diligentissime, C E L S O referente, inquirebant, *quae sit aegri natura: humidum magis, an magis siccum corpus eius sit: validi nervi an infirmi: frequens adversa valetudo, an rara, eaque, cum est, vebemens esse soleat, an levis, brevis an longa: quod is vitae genus sit secutus, laboriosum an quietum, cum luxu an cum frugalitate*. Ex his enim similibusque, saepe novam curandi rationem esse ducendam, probe agnoscebant. Et sic omnes probe circumstantias, atque omnem symptomatum complexum, *συνδρομὴν*, dictum in medendo considerabant. Non enim quodque symptoma b) sive simplex aliquod incommodum, morbum appellabant, sed talem tantum eorum concursum, quae

a) in saepius citata Praefat. b) GALENVS de Subfig. Empir. cap. V.

*ex longa observatione ita simul convenire, comperta sunt, ut pariter incipiant, augeantur, vigeant, declinent, & recedant; et talem symptomatum concursum compendii gratia, uno tantum morbi nomine, originem a parte adfecta, vel similitudine, vel symptomate aliquo, ducente, appellabant. Ex his itaque Empiricos non illotis, uti aiunt, manibus & imprudenter medicam attigisse artem, iuxta ac nostrates impostores, circumforanei, vel verbo, pseudo medici, ut plurimum quoque Empirici, ast minus recte, dicti, temere & nullo consilio, eam exercent, uti mox pluribus hoc ostendam, quivis facile perspicere potest.*

### §. XXI.

Causas e contrario abditas & latentes cum san-  
nitatis, tum morborum, ratione tantum & conie-  
ctura investigandas, tanquam dubias & incertas, ne-  
gligebant. Nam obscurarum *causarum & actionum  
naturalium quaestionem ideo supervacuum esse dicebant,*  
quia natura incomprehensibilis sit; non posse vero  
comprehendi, satis patere ex eorum, qui de his dispu-  
tarunt, discordia: cum de ista re neque inter ipsos sapi-  
entiae professores, neque inter ipsos medicos conveni-  
ret. Discordiam vero inter aliquos obortam, rei alicuius  
incomprehensibilis esse indicium, affirmabant: id-  
co inde esse manifestum, quicquid veri Medici rationa-  
les a priori, uti dicunt, sive per ratiocinia de actionum  
naturalium (quibus simul vitales & animales intelli-  
gebant) & morborum causis obscuris & latentibus  
elicere

elicere essent conati, *meras esse coniecturas, quae minime vero ad morborum curationem pertinerent; quia non intersit, quid morbum faciat, sed quid tollat, & inter initia medicinam, non ab istis esse deductam quaestionibus, sed ab experimentis.* a)

## XXII.

Praeter ea quoque, *inter partes, arti Medicae haud necessarias, numerabant, Anatomes culturam pariter atque scientiam. Imprimis vero illos detestabantur, qui HEROPHILI & ERASISTRATI more, homines vivos inciderent; dum, nimis esse crudele & in humanum, salutis humanae praesidem artem, non solum pestem alicui, sed hanc etiam atrocissimam inferre, putabant: quum praesertim ex his, quae tanta violentia quaererentur, alia in naturali, quo vivo essent homine, statu, non possent omnino cognosci: alia etiam possent sine scelere. Nam, dum ipsa corporis vivi incisione, intestinorum situs & ordo mutaretur, &, diaphragmate discisso, vita statim periret, suo exciderent fine, necesse esset. Partium enim externarum conditionem, omniaque non esse talia, inciso corpore, qualia integro fuerint: ita multo magis interiora, quibus maior mollities, sub gravissimis vulneribus, & ipsa trucidatione, mutari. Neque quicquam esse stultius, quam quale quid vivo homine esset, tale existimare esse moriente, imo iam mortuo. Quicquid autem spirante homine considerari posse, id saepe casum offerre curantibus: interdum*

---

a) CELSVS in praefat, lib. I.

dum enim gladiatorem in arena, vel militem in acie, vel viatorem a latronibus vulnerari, ut eius interior aliqua pars, & in alio alia aperiatur; atque ita sedem, positum, ordinem, figuram, similiaque cognoscere prudentem Medicum, non caedem sed sanitatem molientem, idque per misericordiam *discere*, quod *alii dira crudelitate cognoverint*. Et ob haec *ne mortuorum quidem lacerationem necessariam esse*: quae, etsi non crudelis, tamen, *foeda sit*, & nullum prorsus adferat arti medicae fructum; uti hoc nostris quoque temporibus quidam Medici, doctiores alias visi, audacter, sed pessime sentiunt.

## XXIII.

*Veteres denique illi Empirici fuerunt viri cordati, probi, a) periti, & in Medicina facienda longe clarissimi, atque, ut GALENVS b) loqui amat, minime superbi, aut ambitiosi, neque gloriae inhiantes, non compositae ambulantes, neque fucatis gestibus, sed interius exteriusque toti integri; primi artis medicae patres & antecessores, quippe qui primum Medicinae posuerunt fundamentum, & a quibus artem medicam, quasi relictam haereditatem, possidemus uberrimam. Nam non adeo rudes erant; ut hodie vulgo, sed minus recte, dicti Empirici; dum sua defendere sciebant dogmata, & causam quoque quare cum rationalibus non unam eandemque fovere possent sententiam, in medium afferebant. Principes enim*

a) SHVLTZII Hist. Med. pag. 413. §. XXIII.  
Empir. Cap. XIII.

b) in Subfigur,



*enim huius sectae, ut PHILINVS COVS, SERAPION, ACRON AGRIGENTINVS, APOLLONIVS, GLAVCIAS, HERACLIDES TARENTINVS, qui omnium fuit doctissimus, totos de re medica scripserunt libros, qui omnes vero temporum iniuria perierunt. In hoc autem peccarunt, quod causas & sanitatis & morborum & medicamentorum abditas; item anatomes culturam aequae ac scientiam neglexerint: haec omnia, dicentes, esse incerta, nilque facere ad morborum curationem, uti pluribus iam ante est dictum. Et haec de veterum secta empiricorum hac vice dixisse sufficiant.*

## SECTIO HVIVS DISSERTATIONIS INAVGVRLIS II.

QVAE EXHIBET QVALES SINT HODIERNI EMPIRICI, ET  
AN NOMEN QVOQUE EMPIRICI  
MEREANTVR.

### §. I.

**P**rima sectione absoluta, nunc in hac quoque *hodiernorum ita dictorum Empiricorum conditionem* breviter exponam. *Sunt autem hodierni ita dicti Empirici* homunciones, qui Medicamenta aegrotis exhibent sine *sufficienti* cognitione & morborum & medicamentorum. Hi autem, *in duas commodè dividi posse classes* mihi videntur, & quidem *in rudes & semidoctos*: qui per aliquod tempus quidem in Academiis, omnium bonarum artium emporiis, commorati sunt, sed cum solida artis salutaris fundamenta,

ex ore atque praelectionibus Doctissimorum, & longa artis peritia Excellentium Doctorum atque Praeceptorum haurire, & ea, ut dicunt, in succum & sanguinem vertere debuissent, omne fere tempus potius aliis inutilibus, aut parum tamen, vel nihil ad rem medicam facientibus rebus, nugis ne dicam, atque omnis generis deliciis, corporis animaeque integritati maxime perniciosis tētere studuerunt; nec domi diligenti optimorum librorum, & theoriam & eius adplicationem sive praxin dictam exponentium, lectioni vacarunt; cuius ope nonnunquam solertioris ingenii quidam, si necessariis eruditionis instrumentis non sunt destituti, bonam sibi acquirere valent scientiam; vel alii quoque, cum a puero humaniores non imbibebant quasi disciplinas, aut vix discere coeptas intermiserunt, animumque per aliquot iam annos ad aliud adplicarunt vitae genus, demum vero aliud, ob elatum animum, capientes consilium, collegium practicum, in Academia quadam, a celeberrimo viro praelectum, per semestre, aut si multum diligentiae adhibere volunt, totum fere annum, omnibus fundamentis, ad hoc intelligendum supponendis, destituti audire decernunt, & hoc absoluto ad lares aut locum alium, alii in mente iam Aesculapii, abeunt; tum aegrotantes ibi, aut saltem ipforum auxilium implorantium plurimi, ea gaudebunt felicitate, ut per illorum curam atque operam prorsus singularem omnibus, quibus cum colluctantur, aerumnis ac molestiis, simul & semel eripiantur.

## §. II.

*Empirici rudes* vero sunt medicaſtri illi imperiti, quos vulgus ſaepe pro Medicis habet, qui vero nullo uſi unquam ſunt praeceptore, neque ullo gaudentes fundamento, vel in Anatomia vel Inſtitutionibus medicis, ſed ſuo tantum confidentes theſauro, qui in magnis arcanis vel confuſa potius formularum & medicamentorum farragine atque notitia, uſque quaque ſibi acquiſita, conſiſtit, artem exercent. Hos ideo HIPPOCRATES in Libro de lege, *perſonatis tragoediarum hiſtrionibus eſſe ſimillimos* recte aſſeruit. Nam ut illi habitu, geſtibus veſtituque perſonam Regis aut Heroum referunt, quos tamen non eſſe conſtat; ſic illi Medicaſtri & perſonati Medici veſtibus holoſericis, auro argentove fulgentibus, nec non annulis, reliquoque ornatu ſuperbo atque modum excedente, falſa ac ficta artis oſtentione apud ignobile vulgus, indoctosque proceres titulum Medici, imo Doctoris, ſumma cum impudentia ſibi vendicant: quam ſi, illis exutis ademeris, ſub illorum perſona, aut iudaeum perfidum, aut monachum apoſtatam, tonſorem, textorem, ſuto-rem, bubulcum, carnificem, vel alium omnium bonarum artium ignarum impoſtorem, atque id genus nebulonum, ut aſinum ſub pelle leonis apud Cumanos, latere deprehendes: qui nihil non audent, quo ab adſiſtis aegris per fas & nefas pecuniam, (nam hoc eſt omnium hiſtrionum et falſorum medicorum finis primarius) emungant. Ethī ſacro-

sanctam, ut IOH. LANGIVS a) dicit, Medicinam summi Dei donum, *temerariis ex urina de morbis vaticiniis*, atque aliis nefariis superstitionum nugis, conspurcare non dubitant.

### §. III.

Duplicis autem classis hos rursus esse Medicafros cum CL. BOHNIO b) observamus; scil. vel in publicum & scenam prodeuntes, & per compita, vicōs, oppida, provincias atque regna vagantes, suas artes & pharmaca magnificientes, verbisque sesquipedalibus extollentes, quos ideo erroneos *circumferaneos, histriones & circulatores* appellant; vel alios, qui sedem fixam in loco quodam vel in urbe vel in pago aut vico, habent, aut saltem per aliquot annos usque tristia per multorum mortes facta experimenta, indeque amissa suae peritiae, antea multum iactatae fides, illos alium petere locum, cogunt: interim tamen illis peritiores & honesti magis videri volunt, licet unius eiusdemque sunt farinae, & itidem ac illi temerario ausu artem exercent, quam tamen non callent, vel didicerunt, nec ullum eius fundamentorum specimen, aut testimonium fide dignum exhibuerunt, nec iuramento Medicinae faciendae se addixerunt: quae cuncta tamen unusquisque Medicus legitime promotus praestare tenetur. Et hi Medicastrī per medicamenta inexperta, non

a) in Epist. Medic. Lib. 1. Epist. 1.  
dupl. p. m. 33.

b) in Lib. de Offic. Medic.

non decumbentium loculos solum exhauriunt, quos tamen, si modo sanitatem per illa recuperarent, replere iam valerent, sed etiam, proh dolor ! saepius aegrotos vita, re omnium carissima, dulcissima, vel saltem sanitate, qua nihil praestantius in toto terrarum orbe excogitari potest, spoliant. Ideo quoque ob temeritatem empiricam Cl. BOHNIVS a) illos carnificibus, qui suam quoque artem sola pariter experientia addiscunt, comparat, dum cum FREITAGIO in noct. medic. ita dicit : *habent etiam hoc cum carnifice potestatis commune Medicastris, homines sc. accepta mercede occidere, atque ex homicidio, unde supplicium leges cunctis statuunt, praemium capere. Hoc saltem interest, quod carnifex non nisi ex iudicum sententia interimat facinorosos ; isti vero rudes veteratores, sub praetextu & persona Medici, praeter omne iudicium perimant etiam insontes : ex quo patet, Empiricos hodiernos ipsis adhuc carnificibus esse deteriores ; illi inde a legibus publicis quoque declarantur infames, Vid. L. III. Tit. II. ff. de illis, qui notantur infamia ; et Stryck. U. M. ff. L. III. T. II. §. VII. omnibus autem Medicastris, ne salutarem, quam non didicerunt, artem, temerario exerceant ausu, leges item prohibent publicae L. I. Tit. XVIII. ff. de Offic. Praesid. §. 6. illicitas 7. sicuti &c. & Caroli V. Constit. Crimin. Artic. CXXXIV.*

## §. IV.

Hoc autem Medicastrorum genus, & generi hu-  
 D 3 ma-

a) in Lib. ante citato p. 36.

*mano & reipublicae maxime pestiferum*: cum sine ullo artis fundamento, sine omni anatomes ac morborum cognitione, sine omni causarum, ne occasionalium quidem, aetatis, sexus, temperamenti, aliarumque circumstantiarum, consideratione, sine omni medicamentorum virium rationali cognitione, eorumque legitimo usu, & ita, temerario, scelesto, imo nefando modo, morbos quosvis curare audet, certas necessario fraudes atque impia artificia, ut alii se esse Medicos, credant, adhibere debet; quae igitur haec sint, breviter si recenseo, operae me facturum esse pretium, existimo. Quadruplici vero hoc in primis efficiunt modo: primo per *vestimenta splendida* & haud raro auro vel argento onusta, dum suam satis hisce obtegi ignorantiam credunt: sed hic illud optime, uti mihi videtur, quadrat tritum adagium: *simia est simia, etsi aurea gestet insignia*. Interim spes coepta illos non fallit, nam stupidum aut ignavum vulgus ab exteriori habitu diiudicare saepe solet Medicum; & si multis modo eiusmodi impostor gaudet vestibus, quarum alia aliam pretio superat, eisque indutus, saepius totam pervolat urbem vel vicum, tum vulgus inepte credulum hoc animadvertens, illum statim habet pro Medico, & quidem aliis genuinis Medicis, tali arroganti supercilio & fastu haud incedentibus, sed honestati atque integritati potius deditis, multo doctiore, feliciore, praestantiore, maioriq; arcanorum copia, uti sibi imaginantur, gaudente. Et quid? cum illud alios, in ipsius sententiam abire nolentes, in sole coecutire meridiano, & mente tan-

tantum non esse captos credit? visu enim & cognitu haud sit difficile, Medicum, etsi rationalis sit, illo multo minorem artis peritiā, ac *pauca vel nulla fere possidere arcana*, (ratio sufficiens) dum una eademque semper incedat veste, certo certius sibi persuadet.

### §. V.

Secundo vulgi *auram atque fiduciam sibi acquirunt, per morborum divinationem ex urina*; cum hi impostores fraudulentī & uromantes, non omnis generis morbos solum, sive ab interna, sive ab externa laesione orti sint, sed etiam *sexum aliasque conditiones, & an foemina sit gravida*, ex sola urinae inspectione cognoscere possent, perfrecta fronte nugantur. Sed nullum in nullo mendacio periculum, teste PLINIO, est gravius & perniciosius: Nam ex illa sola, ne ulum quidem morbum, si icterum forte, aut ulcus renum vel vesicae excipias, Medicus etiam rationalis cognoscere valet, multo minus talis ignarus medicaster. Licet vero quaedam corporis adfectiones *ex illius quantitate, colore consistentia & contentis praedici possint*, v. gr. *ex urina intense rubicunda* adesse iudicas fortem cordis motum, celerem atque anxiam respirationem, calorem p. n. sitim magnam, vertiginosos capitis dolores, vigilias, totius corporis lassitudinem, adpetitus defectum, ventrem inflatum & sub-tumidum, murmurantem, atque alvum obstructam; & haec omnia symptomata ordine ita se excipere solent, ut vix unicum in statu morbofo absit vel abesse pos-

possit. Sed quis certum morbum inde divinare vel concludere audet? cum dicta urina non solum variis in morbis, praesertim febribus emittitur, sed a multis aliis quoque causis, sc. liquorum maxime spirituosorum largo potu, medicamentis calidioribus, aromaticis, stimulantibus, atque aliis sanguinem vehementius commoventibus, uti externe motu corporis fortiori, item pariori liquidorum assumptione, imprimis in calidioris temperamenti subiectis, in statu alias sano facile excitari posse, satis liquet. Et sic ex reliquis quoque urinae *Παθολογίας* *νόμους* nil certi sine curiose explorato vel iam noto subiecti statu, ratione temperamenti, aetatis, sexus victus, vitaeque generis cognosci potest. Urina enim cholerico propria, in phlegmaticis iam morbos adesse indicat, & vice versa; item *urina limpida & tenuis* & sanae. fere similis, in *febribus acutis* praesertim *malignis*, si emittitur, ut *plurimum lethale est signum*, uti de his HIPPOCRATES dixit: *pulsus bonus urina bona & aeger moritur*. Quem ergo haecce secum perpendentem fugit, quid certi ex sola urinae inspectione cognoscere possint Medicastrum? quicquid vero procaci ex illa divinant lingua, hoc non ex urina, sed potius *ex adferentibus per callidas, vel per se ipsos, vel per alios expiscari sciunt quaestiones*: de quibus, pluribus videri potest, Thom. BRIAN in Lib. de fraudulenta multorum empiricorum urinae divinatione.

## VI.

Tertio tales *Medicastrum se habere panaceam & ar-*  
co-



*cana*, in quovis morbo efficacissima, & plebis & eruditorum vulgo persuadere tentant, & quidem vel coram vel per alios ebuccinatores, vel quoque per unam alteramve plagulam typis exscriptam, vel etiam novis publicis insertum, & tum nullus superest morbus, quantumvis inveteratus, quem non iis certe, facile, & brevi curare sciunt, & aliquot centum iis iam curarunt. Et hae iactationes stupidum non solum vulgus, sed & alios, qui tamen prudentioribus & eruditis adnumerari volunt, inescare sufficiunt: ut vero pharmaca fraudulenta eo maiorem nanciscantur fidem, tum illa in exteris regionibus ut *Asia & Africa, vel ab Aegyptis vel Indis & nescio, quibus aliis barbaris* & mulomedicis, multo aurò emisse & comperisse scelesti nugantur impostores, & quoniam illa ex omnibus fere terrarum locis per multa, ut dicunt, itinera, eum in finem instituta, conquistata sunt, ideo non vulgarem, sed divinum fere praestare debent effectum.

#### §. VII.

Si igitur a quibusdam in auxilium vocantur, tum, ut magis, se aliis Medicis genuinis *esse doctiores & ob multa itinera & arcana in arte longe peritiores, confirment, omnes alios medicos*, omni data occasione & inprimis coram aegrotis *calumniari*, illorumque eruditionem nihili facere, imo tum hoc, tum aliud in illis vituperare haud erubescunt: & hic est *quartus*, quo utuntur, emergendi *modus*. Aegri vero hasce calumnias esse veras credentes, adhuc impostoris iudicium, de Medico priori vel eius praescriptis medica-

mentis sibi expetunt. Si igitur iunior adhuc est Medicus, illius responsio in promptu est: Iunior adhuc ille est Medicus, nullasque *exterarum regiones*, atque *urbes celebres*, praeter unam vel alteram, & quidem vicinam, adhuc *vidit*, inde ergo! satis constat, illum *perpauca* modo scire, & haud *multa* gaudere posse *experientia*: lingua vero nostra vernacula ita exprimit, Er wäre noch jung/ und hätte noch nicht viel gereiset/ oder wäre doch nicht sehr weit weg gewesen/ könnte also nicht viel wissen/ oder gesehen und erfahren haben. Senior autem si est Medicus practicus, & magnum nominis splendorem, per felicem morborum curationem sibi apud omnes fere iam comparavit, tum sequens, ut nihilo minus ea videatur praestantior & doctior, exhibet iudicium; Plurimi illum doctissimum, & in arte longe peritum crederent virum; verum quibus ex indiciis hoc illi concluderent, se nescire, nec ullo modo videre posse, publice se profiteri necesse haberet: nam haecce ab illo praescripta medicamenta essent vulgaria, atque haud satis hic efficacia; & hoc in pluribus aliis se observasse casibus pronuntiat; ubi ille per sat longum tempus quidem eiusmodi medicamenta inertia, sed sine ullo fructu, adhibuisset, usque se ipse tandem, ab aegrotis efflagitatus, per sua arcana, ex parte quidem praetiosa, e contrario vero semper satis efficacia medicamenta, morbum infregisset; & iisdem hisce iam aliquot centum aegrotos a morbis (scilicet per mortem illatum) feliciter liberasset: Man hielt ihn zwar für einen gelehrten und erfahrenen Mann/ allein

allein das könnte er nicht finden; Denn dieses wären lauter gemeine Medicamente, die hier nichts ausrichten könnten; und dieses hätte er schon bey vielen andern gesehen/ welche selben lange Zeit/ allein vergeblich gebrauchet; bis er denn endlich durch seine/ zwar etwas kostbare/ aber nie fehlschlagende Mittel geholffen/ und wodurch er schon viele hundert andere curiret/ nemlich: in die andere Welt. Sed hic merito quaerendum; qui? quales? quanti? verum pares, ne inferiores videantur, cum illis volvunt cogitationes, dicentes: nos poma natamus; & quis nos esse credet medicos, si ipsi quoque verbis speciem saltem illorum non praebemus?

### §. VIII.

Sed quænam irreparabilia, & reipublicæ & generi humano damna, isti inferunt medicaſtri, multis ſatisque triſtibus exemplis copioſe expoſuit, Doctiſſ. EHRLICH in Diſſert. *de damnis ex empiria medica oriundis*. Quis autem nebulonum peſſimus, non faceret medicinam? cum omnibus in hominum corpus graſſari eſt licitum, nullaque poena præter ignominiam illos manet? verum quod ignominia genus, illos, ex mendaciis fraude ac ignominia compoſitos adficere, atque ab illo temerario auſu deterrire valet? ideo doctiſſ. IOH. LANGIVS in Epist. I. L. I. p. 6. talem ſcelerum licentiam, corruptumque Medicinæ ſtatum ſequentibus dolet verbis: *quis non ab imo pectore ingemiſceret, medicinam, tam*

*sacrosanctum Dei donum, avaritia & ignorantia pseudomedicorum in hominum perniciem converti:*

*Quis pius bonusque aequo feret animo? certe nullus; nisi praefecti aut magistratus δωροφάγοι, qui accepta turpi pecuniola, hac Medicinae monstra, & ludaeos perfidos, in perniciem subditorum alunt, fovent & tumentur: quibus solis fas est, subditorum marsupia foenore exhaurire: & corpora christianorum per medicamenta inexperta, vita, vel sanitate saltem spoliare: & in Ep. II. p. 13. dicit: Magistratus & proceres, accepta a iudeis & reliquis medicis δόξασθαι parva pecunia, libere in corpora subditorum grassari, eosque non tondere, sed deglubere permittant: hac magistratum indulgentia effectum est, ut nulla sit lex, teste PLINIO, quae capitalem medicorum inscitiam puniat: nullum exemplum vindictae: solique medico hominem occidere, & iudeis in corporibus christianorum experimenta per mortes agere, impune liceat. Hac impunitate freti monachi, apostatae, agyrtae, ambubaiarum collegia, balatrone, anus incantatrices, denique carnifices, & qui paterna obligurierint bona, instar Aschinis Socratici ex arte Myrepica alimoniam querentes, in hanc sacram Medicinae professionem, gregatim irrepserunt. Paria quoque fere Cl. BOHNIVS in Lib. supra cit. p.m.38. cum Ah. FRITSCHIO proponit, dicens: in culpa autem sunt magistratus, qui vagam ac publico perniciosam licentiam medicandi non coercent, ἀπαυδαίοντες, ac verae artis protinus ignaros impostores e republica expellunt: utrum vero hi ulcus tetigerint, nec ne, aliis diiudicandum relinquo. Imperii quoque principes di-*

diversi variis edictis, ac legibus provincialibus satis caverunt, ne quis Medicus ad praxin admitteretur, qui in Univerſitate quadam gradum ad munus licentiæ non ſit adeptus. Rationes autem, quæ principem, de ſuorum ſubditorum ſalutē vigilantem, movere ſat valeant, legibus ſevere ut coerceat iſtam medicaſtrorum malitiam, doctiſſ. varioque eruditionis genere verſatiſſimus, maximo nunc vero, & venerandi parentis, & orbis eruditi, dolore ac detrimento ſuperiori anno præmature nimis e vivis ereptus, DOM. ELIAS FRID. HEISTERVS, amicus atque Præceptor meus, dum viveret, integerri- mus, in Diſſert. ſua inaugur. de *Principum cura circa ſanitatē ſubditorum* inſcripta, pro more ſuo, h. e. perſpicue ac ſolide pag. 45. & cum primis p. 55. indicavit; ad quæ ergo ibi legenda, brevitati ſtu- dens B. L. ſcire illa cupientem, remitto.

### §. VIII.

Si igitur de hodiernis medicaſtris dicta confe- rantur cum illis, quæ Sect. I. de veterum empiricis propoſui, tum ſponte *apparebit, quæ ſit inter hos & illos convenientia, quæ differentia*, & quo iure illi ho- die, empirici, cum ἀπειροί, ſive omnis experientiæ veræ ac ſolidæ expertes, potius eſſent dicendi, ap- pellentur. Sed hæc omnia denique, quæ de Me- dicaſtris viris dixi, etiam de illis *ſolidis, ſciolis atque loquacibus*, ut doctiſſ. SYDENHAMIVS p. m. 188. di- cit, *mulierculis*, in ſingulis ferme aedibus reperi-

undis, quae in hominum perniciem, quam non didicerunt, artem, exercent, intellectum velim est quod hic moneam: cum hae nonnunquam per teneram nimis, & intempestivam commiserationem, officiose ineptientes, aliquid commendent aut porrigant, quod corporis statum pravam longe saepius facit deteriorem, & magnum infert damnum, quod haud facile emendare semper licet, & interdum satis funestum evadit.

### SECTIO III.

PROPONENS QUAESTIONEM, AN EMPIRICVS CVM CERTITVDINE MORBVM QVENDAM CVRARE POSSIT ?

#### §. I.

**H**uius autem quaestionis conditionem unusquisque eo melius ut perspicere possit, optimum esse duco, si prius in quo morbi curatio consistat, & quid ad illam requiratur, exponam: quo tum sponte se dabit, utrum illa sit affirmanda, an potius neganda. Quamdiu igitur omnes partes, nostrum corpus constituentes, & solidæ & fluidæ in amicabili consensu, & mutua proportionem sunt constitutæ, ut suas expedite, ad quas a summo Architecto sunt conditæ, præstare possint functiones, tamdiu homo esse sanus dicitur; e contrario autem, quam primum illarum consensus, & mutua proportio labascit, & una vel plures partes a suis deflectere incipiunt functionibus, tum in toto statim corpore contingit mutatio, quam

quam morbi nomine appellamus. Morbus ergo consistit in aberratione vel recessu unius vel plurimum partium a suis functionibus, vel quod idem, in læsione actionum, homini sano alias competentium. Illud vero quod talem functionum mutationem vel læsionem inducit, vel impedit, quo minus partes suas functiones naturales efficere, possint, causam morbi dicimus. Ex quibus ergo sponte patere opinor, illum qui morbum curare intendit, causam eius auferre debere, vel illud remove, quod naturales partium prohibet functiones: nam *sublata causa, ut vulgo dici solet, tollitur effectus*. Morborum igitur curatio consistit in illius, functiones partium impediens, vel lædents, ablatione. Quem ergo, hæc æqua iudicii lancē ponderantem fugit, illum, qui morbos curare suscipit, illos prius quales sint, & quænam earum causæ, cognoscere debere? ignoti enim, uti nulla cupido, ita ignoti morbi quoque nulla iudicatio, nulla, nisi forte fortuita & temeraria, est curatio. Sine verae autem Theoriæ Medicæ, vel Anatomiae, Physiologiae, Pathologiae & Semiologiæ scientia, nulla cum detur, vera aut exacta morborum cognitio, tum ex ipsius rei natura fluit, illum qui morbos cognoscere velit, dictarum Theoriæ Medicæ partium dogmata, penitus callere debere: etenim qui vult finem, etiam velle debet media, quorum ope illum assequi liceat. Quis enim morbos, quatenus a mutata & p. n. partium constitutione dependent, cognoscere valet, nisi omnium partium functiones physicas, quales scilicet fiant:

fiant in statu sano, & conditiones ad tales requisitas, prius habeat probe cognitæ? ut ex illarum comparatione, cum præsentibus functionibus læsis, defectum, & a qua parte morbus suam trahat originem, iudicare & perspicere possit. Quis vero physicam sive naturalem partium functionem recte intelligere aptus est, qui illarum situm structuram, cum aliis partibus connexionem, usum & harmoniam, quæ anatomia docet, ignorat? & quis est, qui ad perfectam morborum cognitionem pervenire possit, qui nunquam operam & diligentiam in studio pathologico addiscendo collocavit? quod unice tamen morbos, illorumque causas, differentias atque effectus generatim docet & explicat: & nullus certe morbum integrum, sine causæ recta cognitione, pernoscere potest, *cum scire sit rem per causas cognoscere.* Quis porro negare audebit, illam Medicinæ partem, quam *Semiologiam* vocant, præ reliquis omnibus, morbos curaturo, maxime esse necessariam? quæ morbum eiusque indolem in singulo individuo, vel quovis subiecto, ostendit, & *signa, pathognomonica dicta*, differentiasque, quibus hunc vel illum morbum ab alio, quocum ratione symptomatum similitudinis, & invasionis modi, maximam alit convenientiam, esse distinctum iudicas, docet ac tradit? & quæ de statu morbi, & præsentis & futuro vel eventu, ex functionum vitalium, animalium, & naturalium, vel maiori vel minori a statu sano, recessu vel destructione, ferre iudicium, medentem instruit. Nullus enim nisi casu & fortui-



tuito curabit morbum, cuius neque naturam & indolem, neque causas illarumque origines factis prius cognovit. Nam quis suam parti cuidam restituere pollet functionem, si quae illa sit, & quibus illa fiat mediis, & a quibus rebus vel causis laedatur, ignorat? & hoc Empiricis olim iam opposuerunt Dogmatici, uti CELSVS a) enarrat; *neminem posse scire quomodo morbos curare conveniat, qui, unde ii sint, ignoret*: eum vero recte curaturum, quem prima causae origo non fefellerit. Qui ergo bene cognoscit & distinguit, ille bene & feliciter curat; nisi vel ex oscitantia vel negligentia curam negligere velit; aut aeger ipse curam admittere aut debita ratione se gerere nolit: uti hoc Doctiss. BOERHAAVIUS in suis Institut. Med. §. 880. seq. adfirmat: *Semiologiae sive signorum tanta est vis ad bene cognoscendum & curandum, ut vix aliud sit, quod plus emolumenti in praxi afferat*: unde etiam summa nocumenta, his neglectis, oriuntur.

## §. II.

*Felix itaque & certa morborum curatio* consistit, in eius causae, bene prius cognitae, correctione vel ablatione: medicamenta ergo propinanda destruere vel remove debent causam, morbum producentem. Qualia autem sint adhibenda, ipsa morbi causa, eiusque indoles prudenti Medico indicat unique determinat. Cum morbus igitur a multis &

F

va

variis excitari possit causis, & maxime inter se diversis, pro varia scil. requisitorum ad functiones partium læsione; quis inde non videt, etiam Medicamenta & remedia debere esse varia & diversa? prout causa morbi hoc requirat. Quomodo autem Medicamenta indicata pro diversa temperamenti, ætatis, sexus, habitus corporis, vitæ generis, causarum, victus, consuetudinis, idiosyncrasiae, aëris, anni temporis, excretionum & virium adhuc præsentium ratione; nec non qua conditione, dosi, tempore, ordine, quocum regimine & quibus cautelis sint applicanda, hoc docent, & Methodus medendi in genere; & regulæ therapeuticæ speciales; inprimis autem Medici iudicium & ratione & experientia, si non propria, tamen aliorum, probe subactum. Haec autem iam supponunt Medicamentorum, ratione materie, præparationis, & virium cognitionem: vel Materiae Medicae, Pharmaciae, & Chymiae scientiam: quorum omnium autem empirici nostri hodierni vel prorsus sunt ignari, vel saltem non satis, ut par est, ea intelligunt.

### §. III.


Quisquis igitur est, si iam iam memorata, probe perpendit, & cum Sectione huius Dissert. II. confert, qui non videat, quanto cum periculo & quantà cum incertitudine empirici hodierni morbum curent? & an arcanis, quæ semper crepant, & de quibus tam impudenter gloriantur, licet ex auro vel quibusvis aliis pretiosis multo atque anxio labore

re ac sudore essent confecta, unico tantum morbo certe, & semper, omnibus in subiectis, & omni posthabita causarum & circumstantiarum consideratione, mederi valeant? quod impudenter illi medicastri, & aegrorum tam divitum quam pauperum crumenae expilatores, nefarie, & magno verborum strepitu de suis arcanis, & medicamentis fraudulenter pretiosis, semper iactitare solent, & inde satis magno pretio, etsi ne unicum quidem auri vel alius rei pretiosae granum illa fraudulenta, facile parabilia, & haud raro satis foetida, ingrediaturs Medicamenta, & divitibus & rerum necessariorum inopibus vendunt; non quaerentes aegrotantium sanitatem, sed eorum pecuniam. Verum nihil magis Medici ignorantiam indicat, quam medicamentorum arcanorum & praetiosorum, quae omnibus mederi debent morbis, iactatio, & crebra illorum mutatio; uti hoc venerandus ille senex HOFFMANNVS in suis Medicinæ fundamentis seq. adfirmat verbis: *qui panaceas & medicinas universales crepant, plerumque indocti, vel deceptores sunt.* Nihilo autem minus non vulgus solum, sed eruditorum etiam plurimi hanc fovent opinionem, certa dari Medicamenta vel arcana, quae absolutam huic vel illi morbo, sine conditione, medendi haberent efficaciam: & hoc est, cur illis impudentibus facile fidem addicant, imo hisce permoti, in suis experimenta faciendi corporibus, illis concedunt potestatem.

## §. IV.

Verum nullum esse in rerum natura, nec dari posse medicamentum, quam artificiose sit concinnatum, anxieque elaboratum, imo optimum, quod in omnibus subiectis sine discrimine, unum eundemque praestet effectum, illi mecum facile consentient, si modo considerant, inter viginti imo centum aegros, uno morbo laborantes, vix ac ne vix quidem tres vel quatuor reperi-ri, in quibus eadem morbi causae, eadem symptoma- ta, eademque semper adsint circumstantiae; quae tamen in omnibus eadem, & perfecte fere similes adesse deberent, si idem semper pari modo sequi deberet effectus: etenim Medicamenta non agere ratione activitatis, sed receptivitatis, inter omnes constat Medicos rationales: e. gr. si idem medica- mentum, cuiuscunque virtutis sit, propinas & cho- lericis & phlegmaticis sub iisdem, quoad sensum, cir- cumstantiis, tum in utroque tamen satis diversum deprehendes effectum, & quidem in cholerico cele- riorem atque evidentiorum; in phlegmatico autem debiliorem & tardiorum: qui tamen, si medica- mentum secundum suam activitatem ageret, vel ab- solutam possideret efficaciam, in ambobus par & idem esse deberet, & nulla adesset ratio, cur in alio alius sequeretur effectus. Ergo non dari Medicamen- ta, quae sine discrimine omnibus in subiectis, certo cuidam morbo mederi queant, satis inde liquet. Prudens autem morbi cuiusvis tractatio, verum ac summum est spe- cificum & arcanum; de qua pluribus legi meretur Dis-

Differtatio illa, *de prudenti morborum tractatione*, sub decanatu Illustr. Dom. PRAESIDIS quondam hic habita. Et haecce, ne dissertationis limites transgrediar, pro tempore, de diversitate Medicinae sectae empiricae veteris atque hodiernae diversitate dixisse sufficiant. Sed cum permulta, eaque gravissima mihi adhuc de perniciofa reipublicae Medicastrorum conditione, & arcanorum vanitate, supersunt argumenta, atque tristia ab illis facta experimenta, haud parum ante exposita, illustrantia atque adfirmantia, quae ex parte ab aliis viris fide dignis mihi relata; ex parte etiam a me ipso sunt observata, quae omnia tamen ob nimiam prolixitatem, in praesenti certas ob causas mihi evitandam, hic omitto. Si autem Deus T. O. M., cui pro viribus clementer hunc usque in diem mihi largitis, gratias ago, quas possum, maximas, vitam vires atque sanitatem porro quoque benigniter mihi concedet, tum me haec omnia, & alia, quae in hisce dictis fortasse desiderari adhuc possent, prolixius atque uberius deducta, intra anni spatium typis exscribenda, prelo subiicere publice promitto: sicque huic imponam labori finem.



PRAENOBILI DOCTISSIMOQUE CANDIDATO  
PRAESES.

*Quamvis quidem multi iam multa de empiricis Medicis eorumque in Republica maximis damnis scripserint, tamen tantum abest, ut tuum novum studium in hoc argumento repetendo, atque uberius exponendo, novaeque in rempublicam inde redundantes demonstrando damnum, quin potius, cum illi, qui perniciosissimae huic pesti mederi debeant, illud vero non faciant, nova eaque prudenti & efficaci admonitione oculi forte eis recte aperiantur, & ex damno, quod civibus inferunt, ad genus hoc hominum pessimorum e Republica exterminandum denuo excitentur, comprobem & laude dignum esse censeam, quia quod Reipublicae valde salutare, dici satis non potest. Duo fere nunc praeterrere secula, cum IOH. LANGIVS, Medicus profecto, si quis alius, & artis usu & facundia clarus ac gravis, cum variis in epistolis eius, tum adhuc magis in Symposio suo, iam publice indicaverit, quod, licet a Magnatibus egregia contra pessimum hocce Medicastrosum genus mandata promulgata sint, tamen a Magistratibus inferioribus plerorumque locorum hac in re graviter peccetur: dum quidam vel ex imprudentia & negligentia, vel ex metu, dum odium horum hominum evitare student, vel ex turpis lucri cupiditate, iis eorumque peccatis vel indulgent, vel eos omnino modo clam, modo aperte, fovent ac tuentur; paucissimi vero eorum magistratum sunt, qui gravi huic Reipublicae malo se-*

*serio mederi cupiant. Tu itaque, Clarissime Domine  
Canditate, quam rectissime facis, ut banc rem, quae  
adeo, prob dolor! vulgo negligitur, Magistratibus, &  
qui iustitiam administrare debent, rursus in animum  
revocare, & gravibus argumentis denuo inculcare, earumque artes & fraudes, quibus subditos Principum  
deludunt, ob oculos ponere studes, ut tandem forte aliquando maiori cura & studio, huic Reipublicae pesti  
se opponant, eamque tandem aliquando extinguant.  
Dum vero in hac, proprio Marte elaborata, dissertatione simul quam egregie demonstras, quid ad verum ac  
genuinum Medicum rationalem requiratur, & quomodo ac quantopere hi a rudibus illis empiricis atque  
impostoribus, qui nobilissimam atque difficillimam artem medicam nunquam didicerunt, differant, etiam  
semper, quod testari possum, dum hic apud nos per quadriennum studio Medico diligenter incubuisti,  
eo omnibus viribus annisus es, ut quam minime aliquando turpem aliquem empiricum ageres, sed potius  
omnes Medicinae partes & theoreticas & practicas quam diligentissime apud nos audivisti, atque dies noctesque ita excoluisti, ut nullam, quae ad verum Medicum  
formandum necessariae sunt, negligere vel vilipendere volueris; sed in omnibus potius, ut par est, excellere allaboraveris, probe observans verissimum illud atque  
praestantissimum CELSI dictum, quod scilicet omnes Medicinae partes ita inter se sint nexae, ut a se  
invicem recte separari nequeant; hoc est, ut nulla carere sine noxa queamus, dum semper altera alteri succurrere, altera alteram iuvare debet: atque sic omnibus animum tuum rite non modo imbuiere, sed satis potius ad  
fe-*

*feliciter aliquando Medicinam faciendam quam plenissime instruere voluisti. Imo his, postquam haec per quatuor annos laudabiliter hic fecisti, nondum animum tuum discendi cupidum exsatiasti, verum ut, cum primis in re anatomica, chirurgica & practica, adhuc maiores faceres progressus, atque uberius in arte medica te perficeres, Berolinum abiisti, atque res has summa diligentia per plures menses, ibidem quoque ita prosecutus es, ut ad praxin medicam faciendam, quam postea etiam in patria per aliquod tempus cum laude & applausu fecisti, legitimo modo accedere, & honores ac privilegia Doctorum rite suscipere possis. Ut vero hoc more maiorum legitime fieret, ad nos nuper rediisti, & prius a collegio nostro, ut ad consuetam examina Medicinae candidatorum admittereris, modeste petiisti. In his vero Te ita deprehendimus, ut sicuti rationalem & prudentem Medicum decet, nunc Medicinam rite, b. e. salva conscientia facere possis. Gratulor Tibi de tam feliciter absolutis studiis academicis, gratulor illi urbi & regioni, quae Te Medicum suum habebit: dum non empiricum aut temerarium, sed, quod praefiscine dixerim, Medicum doctum, prudentem, modestum, diligentem obtinebunt, cui sanitatem, quam Principes iam concrediderunt, tuto etiam committere queant cives: nam certa spes me alit, quod nihil temere nihil timide sed omnia cum prudentia necessaria semper sis acturus.*

*Vale itaque & rem tuam cum Deo age feliciter.*



Quaenam sit fallax methodus, quae certa medendi  
Arte in apollinea, suavis Amice, doces.  
Nosse modum, est aliquid, doctrinae asserta adhibendi;  
Selectum sapiens exhibuisse studet.  
Omnino haec praesens TUA dissertatio docta  
Monstrat, quodque modos examinare scias.  
Doctrinam ergo TIBI, medici & Doctoris honores  
Grator promeritos, & bona cuncta precor!

*Hisce paucis Praenobilissimo ac Doctissimo Domino  
Doctorando, Amico suo suavissimo de in-  
signi eruditionis specimine sincero ex animo  
gratulari, simulque a Deo felicitis Medici  
fortunam apprecari voluit*

J. C. ST. S. C. B.

---

Is demum excellit, longo qui exercitus usu  
Ad fixas leges quaelibet acta refert.  
In TE ars conspirant atque experientia rerum:  
Hinc Medicos inter nobile Nomen habes.

*Hisce applaudere voluit honoribus benemeri-  
tis Doctissimi Domini Doctorandi cum vo-  
to perpetuae prosperitatis  
eius  
deditissimus*

LVDOV. JVL. VRB. FRANCKENFELD  
Acad. Jul. Quaestor.

---

Da liegt der Auster-Merzte Heer  
Durch unsers Kayfers Hand bestritten.  
Seht dort den Ort / wo ihre Ehr /  
Die falsche Ehre / Nocht gelitten:

Es ist Minervens Heiligthum /  
Wo unser Sieger mühtig kämpfte /  
Wo Er mit allgemeinem Ruhm  
Des frechen Feindes Hochmuth dämpfte.  
Hygea sahe diesen Sohn  
Mit innigen Vergnügen streiten ;  
Drum wolte sie Ihm selbst den Lohn  
Des Sieges um die Schläfe breiten.

Seht hier das Schwert und dessen Kraft /  
Womit Er seinen Feind gefällt ;  
Die Schrift und deren Eigenschaft /  
Die uns sein Fleiß vor Augen stellet :  
Durchgeht und lest sie mit Bedacht /  
So werdet ihr ganz deutlich wissen /  
Der angemaachten Aerzte Macht  
Sey dadurch gänzlich umgerissen.

Glück zu denn / Theurer Freund / Glück zu /  
Glück zu dem zweyfach schönem Siege :  
Folgt sonst süßer Fried und Ruh  
Nach einem wol geführten Kriege /  
So müßest Du / mein Freund / auch Dich  
Stets dieses Deines Sieges freuen /  
Und lauter Glück und Segen sich  
Dem neuen Doctor-Hute weihen.

Dieses setzte aus verpflichtestem Gemüthe  
J. P. WOEHNER Th. Candid.  
Opponens.

